

Polazeći od položaja Parlamentarne skupštine Bosne i Hercegovine u ustavno-pravnom sistemu Bosne i Hercegovine s ciljem jačanja njene kontrolne funkcije,

Svjесni činjenice da korupcija predstavlja ozbiljnu opasnost i prijetnju vladavini prava i osnovnim vrijednostima društva, demokratiji i ljudskim pravima, pravičnosti i socijalnoj pravdi, podrivajući demokratske institucije, etičke vrijednosti i povjerenju građana u integritet institucija,

Zabrinuti što korupcija uključuje sredstva koja predstavljaju značajne nacionalne privredne resurse i time ugrožava i koči ekonomski razvoj i ugrožava zakonito funkcioniranje tržišne privrede, izazivajući nepovoljne finansijske posljedice na pojedince i privredne subjekte i društvo u cjelini,

Uvidjevši neophodnost razvoja zdravih i uravnoteženih odnosa između države, civilnog društva i tržišta, te mogućnosti za jačanje efikasnosti parlamenta, kao institucije koja podstiče odgovornost odobravanjem politika i djelovanja izvršne vlasti,

Utvrdivši da se korupcija na najbolji način može staviti pod kontrolu jačanjem sistema odgovornosti, transparentnosti i učešća javnosti u procesima upravljanja,

Ističući riješenost da se društvo zaštiti od korupcije dosljednom primjenom donesenih i donošenjem odgovarajućih zakona u skladu s principima i odredbama Konvencije Ujedinjenih naroda protiv korupcije, Krivičnopravne konvencije o korupciji i Građanskopravne konvencije o korupciji Vijeća Evrope,

Uvažavajući preporuke Komiteta Vijeća Evrope za borbu protiv korupcije (GRECO),

Ubijedeni da korupcija nije samo lokalna već transnacionalna pojava, koja pogađa sva društva i privrede, što čini neophodnom međunarodnu saradnju na njenom sprečavanju i suzbijanju,

Uviđajući važnost udruživanja parlamentaraca na zajedničkim projektima u borbi protiv korupcije, izradi zajedničkih strategija, razmjeni informacija, iskustava i stečenih znanja, te razvoju inicijativa za jačanje parlamenata u borbi protiv korupcije,

Riješeni da se aktivno uključimo u rad Globalne organizacije parlamentaraca za borbu protiv korupcije (GOPAC), radi jačanja uloge Parlamentarne skupštine Bosne i Hercegovine u prevenciji i borbi protiv korupcije,

grupa poslanika i delegata iz oba doma Parlamentarne skupštine Bosne i Hercegovine na konstituirajućoj sjednici, održanoj 9. 12. 2016., donijela je

POVELJU
Globalne organizacije parlamentaraca za borbu protiv korupcije u
Parlamentarnoj skupštini Bosne i Hercegovine

Član 1.
Naziv

Naziv ogranka Globalne organizacije parlamentaraca za borbu protiv korupcije je „Ogranak Globalne organizacije parlamentaraca za borbu protiv korupcije u Parlamentarnoj skupštini Bosne i Hercegovine“ ili skraćeno „GOPAC PSBiH“.

Član 2.
Sjedište

Sjedište Ogranka Globalne organizacije parlamentaraca za borbu protiv korupcije u Parlamentarnoj skupštini Bosne i Hercegovine (u daljnjem tekstu: GOPAC PSBiH) je u zgradi Parlamentarne skupštine Bosne i Hercegovine, Trg Bosne i Hercegovine 1, Sarajevo.

Član 3.
Saradnja

- (1) GOPAC PSBiH saraduje s Globalnom organizacijom parlamentaraca za borbu protiv korupcije (u daljnjem tekstu: Globalna organizacija).
- (2) GOPAC PSBiH saglasan je da će saradivati s drugim ograncima Globalne organizacije, neposredno ili u okviru regionalnog ogranka.

Član 4.
Karakter GOPAC-a PSBiH

- (1) GOPAC PSBiH je nestranačka parlamentarna grupa koja djeluje na principu dobrovoljnosti, demokratičnosti, transparentnosti i zabrane diskriminacije na bilo kom osnovu.
- (2) GOPAC PSBiH okuplja parlamentarce i druge zainteresirane strane, s ciljem borbe protiv korupcije, unapređenja transparentnosti i odgovornosti unutar institucija vlasti Bosne i Hercegovine, te osiguranja visokog standarda integriteta u javnom sektoru.

Član 5.
Povelja GOPAC-a PSBiH

Povelja GOPAC-a PSBiH ne odstupa od ciljeva i zadataka Globalne organizacije i usklađena je sa Statutom Globalne organizacije.

Član 6.
Ciljevi GOPAC-a PSBiH

- (1) Ciljevi GOPAC-a PSBiH su prevencija i borba protiv korupcije, promoviranje principa transparentnosti i odgovornosti u Parlamentarnoj skupštini Bosne i Hercegovine, kako bi se osigurali široki standardi integriteta, a naročito:
 - a) realizacija ciljeva Globalne organizacije koji se odnose na uspostavljanje standarda ponašanja, s ciljem promocije transparentnosti, odgovornosti i dobrog upravljanja,
 - b) promocija vladavine prava i odgovornosti institucija vlasti u BiH,
 - c) razvoj kapaciteta Parlamentarne skupštine Bosne i Hercegovine (u daljnjem tekstu: PSBiH), s ciljem jačanja njene kontrolne funkcije i demokratskog nadzora institucija izvršne vlasti na nivou BiH,

- d) omogućavanje razmjene informacija, znanja, najboljih praksi i iskustava među članovima GOPAC-a PSBiH u vezi s antikorupcijskim mjerama,
- e) podsticanje poslanika i delegata iz oba doma PSBiH s ciljem donošenja zakonskih rješenja kojima se promoviraju transparentnost, odgovornost i efikasno upravljanje,
- f) promoviranje mjera usmjerenih na djelotvorno rješavanje pitanja korupcije i podizanje svijesti o problemu korupcije na svim nivoima društva
- g) edukacija poslanika i delegata u PSBiH o oblicima, karakteru i načinu prevencije i borbe protiv korupcije,
- h) djelovanje s ciljem poboljšanja sposobnosti institucija BiH da se djelotvorno nose s korupcijom,
- i) saradnja s domaćim i regionalnim tijelima na mobilizaciji resursa za antikorupcijske programe, uključujući i:
 - podršku aktivnostima drugim ograncima Globalne organizacije u svijetu,
 - razmjenu informacija putem internetskih stranica, elektronske pošte i drugih servisa,
 - učešće u seminarima i radionicama o prevenciji i borbi protiv korupcije,
 - povezivanje i saradnju s međunarodnim organizacijama, parlamentima drugih zemalja, institucijama izvršne vlasti, kao i pravosudnim institucijama, civilnim društvom i drugim organizacijama o svim pitanjima u vezi s unapređenjem njihovog rada, transparentnosti i odgovornosti,
 - provođenje istraživanja, razmjenu informacija i dostavljanje podataka o najboljim praksama i iskustvima i
 - promoviranje angažiranosti članova GOPAC-a PSBiH, a time i ciljeva Globalne organizacije,
- j) provođenje drugih aktivnosti kojima se pruža podrška i promovira realizacija ciljeva GOPAC-a.

Član 7. Donošenje odluka

GOPAC PSBiH donosi odluke natpolovičnom većinom glasova od onih koji su prisutni i koji glasaju, uz uslov da ta većina obuhvata jednu trećinu prisutnih predstavnika svakog konstitutivnog naroda.

Član 8. Članstvo

- (1) Članovi GOPAC-a PSBiH su aktuelni i bivši poslanici i delegati u PSBiH.
- (2) Članstvo u GOPAC-u PSBiH stiče se podnošenjem molbe za prijem.
- (3) Članstvo u GOPAC-u PSBiH uključuje i članstvo u Globalnoj organizaciji.
- (4) Nezavisni organi i tijela na nivou BiH, naučne i obrazovne institucije, organizacije civilnog društva, kao i međunarodne organizacije i institucije čiji su ciljevi isti kao i ciljevi Globalne organizacije, mogu imati status pridruženog člana, za šta podnose zahtjev GOPAC-u PSBiH.

Član 9. Kodeks ponašanja

- (1) Član je dužan da se ponaša i obavlja svoje dužnosti u skladu s vrijednostima i ciljevima za koje se zalažu GOPAC PSBiH i Globalna organizacija, da ih promovira, kao i da doprinosi zaštiti integriteta tih vrijednosti.
- (2) U skladu s važećim zakonskim rješenjima, član je dužan da izbjegava sukob interesa.
- (3) Ako uoči okolnosti koje mogu dovesti do sukoba interesa, član je dužan da obavijesti Izvršni odbor GOPAC-a PSBiH i Upravni odbor Globalne organizacije o mogućem postojanju sukoba interesa.

Član 10.
Organi GOPAC-a PSBiH

- (1) GOPAC PSBiH ima Izvršni odbor.
- (2) Stručne i administrativno-tehničke poslove za GOPAC PSBiH obavlja Sekretarijat Parlamentarne skupštine Bosne i Hercegovine.

Član 11.
Izvršni odbor

- (1) Izvršni odbor ima tri člana.
- (2) Članove Izvršnog odbora bira GOPAC PSBiH iz reda poslanika i delegata u PSBiH.
- (3) Izvršni odbor čine predsjedavajući, prvi i drugi zamjenik predsjedavajućeg, koji su iz tri konstitutivna naroda u BiH.
- (4) Predsjedavajući i prvi zamjenik predsjedavajućeg ne mogu biti članovi istog doma PSBiH.
- (5) Članovi Izvršnog odbora biraju se jednom godišnje.
- (6) Član Izvršnog odbora bira se na godinu dana i može biti ponovo izabran na još jedan mandat.
- (7) Predsjedavajućeg Izvršnog odbora, u slučaju njegove spriječenosti ili odsustva, mijenja prvi odnosno drugi zamjenik predsjedavajućeg.
- (8) Sekretar koordinira rad GOPAC-a PSBiH i brine o njegovoj dokumentaciji.
- (9) O radu na sjednicama Izvršnog odbora vodi se zapisnik koji potpisuju predsjedavajući Izvršnog odbora i sekretar.

Član 12.
Djelokrug Izvršnog odbora

(1) Izvršni odbor:

- a) organizira godišnje i posebne sastanke GOPAC-a PSBiH, određuje vrijeme, mjesto i dnevni red tog sastanka;
- b) predlaže godišnji program rada i o usvojenom godišnjem programu obavještava Sekretarijat Globalne organizacije;
- c) u saradnji sa Sekretarijatom Globalne organizacije organizira aktivnosti GOPAC-a PSBiH;
- d) dostavlja Sekretarijatu Globalne organizacije izvještaj o aktivnostima nacionalnog ogranka;
- e) prima molbe za prijem u članstvo ili pridruženo članstvo;
- f) predlaže GOPAC-u PSBiH isključenje člana;
- g) predstavlja GOPAC PSBiH;
- h) vrši druge poslove u skladu s ovom poveljom.

(2) Sastanke Izvršnog odbora saziva predsjednik Izvršnog odbora.

(3) Izvršni odbor odlučuje konsenzusom svih članova Izvršnog odbora. Ako napori da se postigne konsenzus na uspiju, odluke donosi GOPAC PSBiH.

Član 13.
Prestanak članstva

(1) Članstvo u GOPAC-u PSBiH prestaje u slučaju smrti, isključenjem ili dobrovoljnim istupanjem iz organizacije.

(2) Član GOPAC-a PSBiH može biti isključen iz organizacije:

- a) odlukom GOPAC-a PSBiH;
 - b) na obrazloženi prijedlog Izvršnog odbora i
 - c) ako postupa protivno vrijednostima i ciljevima za koje se GOPAC PSBiH i Globalna organizacija zalažu, u skladu s ovom poveljom i Statutom Globalne organizacije.
- (3) Član koji je isključen odlukom GOPAC-a PSBiH može uložiti prigovor na odluku Upravnom odboru Globalne organizacije, u roku od tri mjeseca od dana donošenja ove odluke.
- (4) Član koji želi da istupi iz organizacije dostavlja izjavu o istupanju iz Globalne organizacije Izvršnom odboru GOPAC-a PSBiH u pisanoj formi.
- (5) O istupanju iz članstva Izvršni odbor GOPAC-a PSBiH obavještava Upravni odbor Globalne organizacije.

Član 14. Sekretarijat

(1) Sekretarijat:

- a) obavlja stručne i administrativne poslove za GOPAC PSBiH i Izvršni odbor;
- b) vodi evidenciju o članstvu i o tome obavještava Sekretarijat Globalne organizacije;
- c) promovira rad GOPAC-a PSBiH i Globalne organizacije, čime doprinosi širenju članstva;
- d) prikuplja i širi informacije o Globalnoj organizaciji i njenim članovima;
- e) koordinira rad članova GOPAC-a PSBiH;
- f) obavještava članove o programu i aktivnostima GOPAC-a PSBiH;
- g) održava veze i koordinira aktivnosti između ogranaka Globalne organizacije u regionu, Sekretarijata Globalne organizacije i drugih grupa ili institucija;

- h) koordinira predstavljanje GOPAC-a PSBiH na konferencijama Globalne organizacije;
- i) obavlja i druge poslove za potrebe GOPAC-a PSBiH i Izvršnog odbora.

Član 15. Finansiranje

GOPAC-u PSBiH, kao nestranačkoj i dobrovoljnoj parlamentarnoj grupi, podršku u radu pružaju međunarodne organizacije, fondacije i institucije, kao i organizacije civilnog društva, putem logističke podrške i specijaliziranih projekata i programa.

Član 16. Postupak za izmjenu Povelje

- (1) Prijedlog za izmjenu Povelje može podnijeti bilo koji član GOPAC-a PSBiH;
- (2) Prijedlog se podnosi Izvršnom odboru u pisanom obliku i s obrazloženjem.
- (3) Predsjedavajući Izvršnog odbora, odmah po prijemu, dostavlja prijedlog članovima GOPAC-a PSBiH i Sekretarijatu Globalne organizacije.
- (4) Odluka o izmjeni Povelje usvojena je ako je za nju glasalo dvije trećine članova GOPAC-a PSBiH.
- (5) Odluka o izmjeni Povelje dostavlja se Sekretarijatu Globalne organizacije u roku od 30 dana od dana donošenja odluke.

Član 17
Raspuštanje GOPAC-a PSBiH

- (1) Prijedlog za raspuštanje GOPAC-a PSBiH može podnijeti trećina članova GOPAC-a PSBiH.
- (2) Prijedlog se podnosi Izvršnom odboru u pisanom obliku i s obrazloženjem.
- (3) Predsjedavajući Izvršnog odbora odmah po prijemu dostavlja prijedlog svim članovima GOPAC-a PSBiH.
- (4) Predsjedavajući Izvršnog odbora saziva poseban sastanak GOPAC-a PSBiH u roku od 15 dana od dana prijema prijedloga za raspuštanje GOPAC-a PSBiH.
- (5) GOPAC PSBiH raspušta se ako je za prijedlog glasalo tri četvrtine članova.
- (6) Odluka o raspuštanju GOPAC-a PSBiH dostavlja se Sekretarijatu Globalne organizacije u roku od 30 dana od dana donošenja odluke.

Član 18.
Stupanje na snagu

Povelja stupa na snagu danom donošenja.

U Sarajevu, 9. 12. 2016. godine

ČLANOVI GOPAC-a PSBiH:

Babalj Darko

Gasal Vražalica Maja

Kožul Predrag

Magazinović Saša

Majkić Dušanka

Šepić Senad

Zovko Ljilja